

Yëkkuö kit Judas tö

Judas

Yëkkuö i' kit Judas tö. Kè s'wà ijcher mokië tö yi dör ie'. Erë welepa tö ibikeitsè tö Jesús ttekölpa tsá e' eköl kiè Judas cheke Lucas tö (Lucas 6.16; Hechos 1.13), e' tö ikit. Pè' taië tö ibikeitsè tö ie' dör Jesús ël eköl wës Santiago es. Mateo 1.55 ena Marcos 6.3 e' tö Jesús ël kiè Judas e' chë, e' kuëki welepa tö ibikeitsè es.

Judas tö yëkkuö i' kit Jesús mik erblökwapka a, ie'pa a s'wöbla'uk kache tté wa, esepa biyó choie. Pè' esepa dë'bitü e' chök tö ie'pa dör Jesús mik erblökwapka erë ie'pa dör s'kitö'ukwapka ëme. Ie'pa ki Jesús mik erblökwapka kiane tsëmi ñala sulu ki. E' chök Judas tso' ie'pa a tö a' e' kkö'nú iyöki. Ie'pa esepa tö s'wöbla'weke tö Skëköl éna se' dalër taië ena ì sulu nuí tso' se' ki e' olo'ya'itö s'ki, e' kuëki se' a ì sulu kí wamblërmi. Judas tö iché tö e' kè dör es. Ká iaiaë wépa bak e' wamblök suluë e'pa we'ik Skëköl tö siarë. E' sù ie' tö s'kitö'ukwapka ñe' we'ikeraë. E' kkachak Judas éna Jesús mik erblökwapka a e' kuëki ie' tö yëkkuö i' kit.

Shkë'wè

¹Ye' dör Judas, ye' dör Jesucristo kanè méso, ñies ye' dör Santiago ël, e' tso' yëkkuö i' shtök a' a. Skëköl dör S'yé e' tö a' klöo'bak ie' ala'rie. Taië a' dalër ie' éna. Jesucristo tso' a' tsatkök ì sulu kos yöki. ²As Skëköl tö a' saü er siarë wa ena sene bèrë kí mù a' a. Ñies as a' kí ñi dalëritsò taië.

Jesús tté buaë, e' tsatkó

³A yamipa, a' dalër taië ye' éna. Kewe ta ye' ibikeitsé yëkkuö shtök a' a se' tsatkëne e' tté pakoie. Erë ye' ittsé tö ye' kawötä kköchök a' a tö tté mik se' erblöke e' tsatkó kekraë. Tté e' meneat etökicha ëme s'batse'rupa a kkö'nè kekraë. ⁴Pè' welepa dewa a' shüa, erë a' kibiiepa kè wà ijcher tö e'pa dör s'kitö'ukwapka. E' kuëki ye' tso' yëkkuö i' shtök a' a. Esepa kè tö Skëköl dalöieta' moki. Ie'pa tö icheke tö ie' er buaë ché se' a, e' kuëki ì sulu kos wamblak se' éna, e' wamblëmisö, kè ulé klöule. Erë kè idör es. Tté e' wa ie'pa tö Skëképa Jesucristo dör se' blú eköl è, e' dalösewéwa. Ká iaiaë Skëköl tö iyë'bak iyëkkuö kí tö esepa kos wömeulettsatke weinuk

aishkuö ta. E' kueki ye' tso' a' a ichök tö Jesús tté buaë tsatkó ie'pa esepa yöki.

Skököl tö ì sulu wamblökwakpa we'ikeraë

⁵A' wä ijchertke buaë, erë ye' éna ichakne a' a, as a' éna iarne tö Skököl tö Israel aleripa tsatkë'ttsa egiptowak ulä a, yë'ttsa Egipto. E' ukuöki ta ie'pa wépa kè erblène ie' mik e'pa eo'waitö. ⁶Ñies a' éna ianú tö Skököl biyöchökwakpa, e'pa welepa tö kanè mène ie'pa a, e' olo'yé ta ie' yélur wé ie'pa bak senuk ee. E' kueki ie' wä ie'pa tso' wötëule stui ké a. Eë ie'pa tso' moule tabechka kè butsta'ttsa yöbië ese wa. Eë ie'pa tso' ikichatërke e' kèwö panuk. ⁷Es ñies a' éna ianú tö Sodoma ena Gomorra wakpa, ñies ká tso' tsinet ie'pa o'mik e' wakpa, e'pa bak trënuk taië ena e' ya'uk suluë. E' kueki Skököl tö ie'pa kos we'ik michoë bö' wa. Ie'pa wa ie' tö ikkaché tö ì tköraë ì sulu wamblökwakpa ta'.

⁸Es ñies wépa chök ye' tso' a' a, esepa e' wamblö suluë. Ie'pa e' ia'ukekë trë wa ta ichekerakitö tö e' kkayëne ie'pa a kabsuë a. Ñies Skököl ttë watekerakitö ena ibiyöchökwakpa olo ta' taië, e'pa chekerakitö suluë. ⁹Ká iaiäë mik Moisés blënewa, eta bé ki inü kiane, erë Skököl biyöchökwak wökir eköl kië Miguel, e' kè tö imè ie' a, e' kueki ie'pa ñi iüté iki. Miguel dör Skököl biyöchökwak olo ta' taië ese, erë ie' kè wä bé yëne suluë as ikichatër. Ie' tö iché ia: “Skököl tö be' unü.” E' è ché Miguel tö ie' a. Eta zwes wépa chök ye' tso' esepa tö Skököl biyöchökwakpa chëmi suluë? ¹⁰Ì kè ane ie'pa éna, ì kè jcher ie'pa wä, ese kos cheke suluë ie'pa tö. Erë ì jcher ie'pa wä iwákpa er wa, ese wambleke ie'pa tö kè wä bikeitsule wes iyiwak es. E' kueki ie'pa weirdaë siarë aishkuö ta.

¹¹ÌWéstela ina ie'pa ta! Ie'pa e' wamblö suluë wes Caín e' o' es. Ie'pa tö ttë mokí olo'yé inuköl klö'woie wes Balaam es. Ie'pa tö Skököl dalösewéwä wes Coré tö Moisés dalösewä es. E' kueki aishkuö ta ie'pa weirdaë siarë wes Coré es. ¹²Mik a' ñi dapa'uke chkök di'yök ñita er bua' wa Cristo kötewä e' kèwö tkö'uk, eta e' sulu'wekewä ie'pa tö wes ie' wamblörak ese wa. Ie'pa kè jaër ì sulu wamblök kawö e' a. Ie'pa er me'rie iwákpa è kkö'nuk. Ie'pa dör s'kitö'ukwakpa wes kalí dami siwa' wa taië, erë kè iwà yër yës es. Ie'pa dör wes kal kè wör ta' mik iwörke e' kèwö ska' es. Ie'pa dör wes kal ponettsa iwìe e' sirwä es. ¹³Ie'pa tö ì sulu wambleke kè jaër ta', e' uyekerakitö wes dayë tö íyi tso' kos ie' a e' uyëttsa ur'ki es. Ie'pa dör wes bëkwö kè ku'ar ek tsiní ème es. Skököl wä ká tso' ie'pa a ttsettseë, eë ie'pa wötërdawä kè yërpattsaiä.

¹⁴Adán aleripa de ie' itökí dökä kul, e' shuä wëm eköl bak, e' kië Enoc. Ie' tö pë' sulusi esepa yë' i' es Skököl ttekölíe: “Ye' ttö tso'. Skököl döraë ibiyöchökwakpa batse'r taië shutë e'pa ta ¹⁵sulitane shulök. Pë' sulusipa kè tö ie' dalöieku' tö ì sulu wambleke tö ie' cheke suluë, esepa kos wömerattsä ie' tö weinuk.” ¹⁶Wépa chök ye' tso' a' a, esepa wa íyi ulitane

wër suluë, íyi ulitane tò ie'pa kköchöweke. Ì sulu kiane ie'pa kî wamblè ese wamblekerakitö. Ie'pa e' ttsòka tajë. Ñies s'malepa dakiñekerakitö ttè ttsè'r bua' ese wa as tò iù wes ie'pa kî ikiane es.

A' e' tkówa darërëë Skëköl ttè a

¹⁷Erë a yamipa, a' dalër taië ye' éna. Ì yè' Skëképa Jesucristo ttekölpa tsá e'pa tò, e' ska' a' er anú. ¹⁸Ie'pa tò se' a iyè': "Mik ká i' erkewatke, etá s'wayuökwakpa datse tajë. Ie'pa serdaë wes ie'pa wák dër suluë kî ikiane senuk es." ¹⁹Ye' tò a' a ichè tò pé' esepa tso' a' shua a' blabatsök. Ie'pa serke wes ie'pa er tò ikieke ia es. Skëköl Wiköl kè ku' ie'pa ta.

²⁰Erë a yamipa dalër taië ye' éna, ttè batse'r ichökle mik se' erblöke, e' a a' kî er diché ió. A' ttó Skëköl ta Wiköl Batse'r wa. ²¹Skëképa Jesucristo tò se' sué er siarë wa, e' kuekî sene michoë döraë se' ulá a' aishkuó ta, e' wà panuk se' tso' er bua' wa. E' dalewa kè a' éna ichökwa tò Skëköl éna se' dalër taië, e' a a' e' tkówa darërëë.

²²A' wépa erblöke Jesús mik, erë ibikeitsekeia bötböt, esepa saú er siarë wa ta ie'pa kimú. ²³A' wépa skà mi'ketke ì sulu a, esepa tsatkó wes s'ñarkewa ese tsatkèsö es. A' wépa skà tso' ì sulu wamblök taië ichók, esepa saú er siarë wa ta ikimú, erë a' tso' erkî dö' a' armi ì sulu wambleke ie'pa tò e' a. Ì sulu wambleke ie'pa tò, e' yöki a' suanú taië; e' kè kiarwa a' a' elkela wë'ia.

Ttè bata

²⁴Skëköl è a se' kkö'narmi as kè s'armine ì sulu a. Ie' è a se' nuì olo'yarmi as se' dö' ie' olo taië e' wörki ttsè'ne buaë wa, kè kî ì sulu ta' yës. E' kuekî ie' kíkòkasö ttè bua' wa. ²⁵Ie' kíkòkasö Skëképa Jesucristo batamik. Ie' dör eköl ème. Ie' dör S'tsátkökwak. Tsawe ta, i'ñe ta, ñies dö' kekraë ie' olo ta' taië, ie' diché ta' taië íyi ulitane tsata. Ie' dör se' blú taië. As sulitane tò ie' kíkòka er bua' wa kekraë. Es e' idir.